


Daxmeh Caeuq Gou Gangj “Cozyez”

妈妈和我谈“作业”



Ngamqngamq gauj sat geizmued gaujsi, bonjlaiz siengj swnh youq ndaw gyajgeiz cuengqsoeng swheij ndeindei yietnaiq, mbouj siengj daengz lij yaek sij cozyez beij bya lij naek. Gij cozyez yaek sij haenx couh mbouj noix, hagdangz vih hawj dou gvaq aen gyajgeiz miz yiye ndeu, youh buci haujlai sizcenj cozyez. Gou moix ngoenz lij yaek lienh gimz, youq gwnz vangjloz guh cozyez Yinghyij. Laeb-

daeb song ngoenz, gou cungj mbouj rox baenzlawz guh cij ndei, gip dwk naengbak cungj hwnj bop lo.

Daxmeh yawj gou cungj yiengh-siengq neix, cam gou baenzlawz lo, gou couh gangj gij nyapnyuk gou hawj daxmeh nyi. Daxmeh mboujdanh mbouj doengzcingz gou, gingqyienz lij riuwhw naeuz: “Gou laihnaeuz miz gijmaz saeh hung ne, couh di neix ha!”

“Baenzlai cozyez mwngz lij yiemz noix?” Gou hozndat dwk naj cungj nding lo. “Mbouj dwg mwngz sij, mwngz dangyienz yienghneix gangj lo.”

Daxmeh lumjbaenz yawj rox simsaeh gou, couh riu dwk doiq gou naeuz: “Lajmbwn mbouj dan mwngz cij miz cozyez, daxmeh hix miz ‘cozyez’ ha!”

“Gijmaz? Daxmeh lij miz ‘cozyez’?” Gou ngeizrwd dwk byaengq aenda.

Daxmeh riunyumj iet lwg fwngz he gvet aenndaeng gou, “Baenzlawz lo,

mwngz mbouj saenq ha? Mwngz yawj gou moix ngoenz yaek cawx byaek, cawj haeux, saeg buh, sousib aenranz; miz seiz lij bae gyau cienzraemx cienzdienh; ndaw danhvei saehcingz lai, banhaemh lij beigo, lij gingciengz hagsib, mboujne couh lotlaeng lo; lij miz……”

Gou mbwnjmbwnj aenbak, mbouj dawz vah daxmeh haeuj sim.

“Miz seiz lij miz ‘cozyez’ gaenjgip, lumj song ndwen gonq, daiq mwngz baenz bingh liuziyh, youq yihyen youq cibgeij ngoenz, gou couh daj danhvei, yihyen, ndawranz baedauq buet.”

Dwg ha, mboengq haenx daxmeh cungj naet dwk byom lo.

“Daxboh mbouj youq ranz, ranz moq raeuz youh yaek cangndei, daxmeh lij yaek causim baenzlawz cang, youh caeuq canghcangndei bae cawx caizliu, mwngz mbouj dwg hix siengj ranz raeuz cang ndaej gyaendei ha?”

Gou yunghrengz ngaekngaek gyauej.

Deng bw, daxmeh gyaed diuq-foux, lij ciengz camgya biuyienj. Geizgvaiq lo, baenz lai “cozyez”, bae gizlawz aeu baenz lai seizgan ne?

Yawj gou aennaj ngeizrwd, daxmeh naeuz: “Seizgan couh lumj raemx ndaw haijmenz, siengj nyaenj ok raemx cungj nyaenj ndaej ok. Mwngz sien guh giva, hag rox hableix anbanz seizgan, guhdaengz caemh guh caemh yiet, mboujdanh mbouj naet, lij guh noix ndaej lai. Mwngz naeuz dwg mbouj dwg ha?”

Daxmeh caen miz banhfap. Gou vihmaz mbouj hag daxmeh ne? Sij cozyez caeuq danz gimz, youq gwnz vangjloz sij cozyez Yinghyij dox giethab, okbae guhcaemz caeuq sevei sizcenj hozdung dox giethab. Deng, couh yienghneix guh! Gou itdingh ndaej gvaq aen gyajgeiz youh soengswt youh miz yiye ndeu.

(haj nienzgaep Hanz Cingczunz)

Guenjgya Iq Ndawranz

家庭小管家

Miz ngoenz ndeu, gou cuengq-hag ma daengz ranz, ngamq haeuj ranz, couh dingqny i daxmeh caeuq daxbuz gangjavah: “Ndwen neix cienz-raemx caeuq cienzdienh baenzlawz youh baenzneix lai ha?” Dwg bw, cienzraemx caeuq cienzdienh ranz gou cungj beij bouxwnq lai. Gou itcig mbouj rox neix dauqdaej dwg vih gijmaz? Yienghneix gou couh laeglemx bae cazyawj.

Doenggvaq cazyawj duenh seizgan he, gou fatyienh ranz gou miz haujlai sibgvenq mbouj ndei yungh raemx yungh dien: Moix baez hai dienhdaeng, vunz mbouj youq lo cungj mbouj gven daeng; Ndaw ranz lij rongh, mbouj yungh

hai daeng, hoeng ndaw ranz lij hai haujlai daeng; mbouj miz vunz yawj densi, hoeng densi lij ciuqyiengh hai; mwh yawj densi, yawj dwk yawj dwk couh ninzdaek lo, ndiu gvaqdaej, densi lij hai dwk. Yungh raemx couh engq sai raemx lo, swiq naj swiq din mbouj yungh baenzlai raemx, hoeng lij dwg coux baenz doengj baenz doengj raemx daej swiq; mwh swiq vanj, hai raemx suijlungzdaez laefafa cung swiq; raemx swiq byaek, swiq din, saeg buh, cungj baenz bat baenz bat dauj bae, caen hojsik ha.

Gou dauqdaej ra daengz yienzaen lo! Gou angq dwk lwnh hawj daxmeh nyi. Daxmeh gig

doeksaet, haenh gou dwg boux lwgnyez saeqsim he. Yienghneix gou gietdingh youq ranz gou guh mbaet raemx mbaet dien hozdung. Gou heuh vunz ndaw ranz daej, aeu gij giva gou lwnh hawj daihgya, gyoengqde cungj haenh gij giva gou. Vunz ndaw ranz caezsim roengzrengz, gaij gij sibgvenq mbouj ndei gaxgonq bae. Dou guh daengz vunz byaij daeng ndaep, caenh-liengh noix yawj densi. Raemx swiq byaek aeu daej rwed va cung diengzhaex, raemx saeg buh aeu daej ut deihbanj. Ndwen seizgan ndeu gvaqbae, caen miz yungh dahraix, cienzraemx cienzdienh ranz gou noix bae haujlai.

Couh yienghneix, ranz gou itcig mbaet yungh raemx yungh dien. Gienh saeh neix gvaqlaeng, daihgya cungj heuh gou guh “guenjgya iq”. Gou gyaed aen coh neix, gou gyaed dang “guenjgya iq ndawranz”.

(seiq nienzgaep Cuih Gingboz)



Gou Loek Lo

我错了

Miz ngoenz ndeu gwn haeuxcaez, daihgya cungj gwn liux lo, cij lw gou boux dog caengz gwn liux. Caj daihgya cungj lizhai aendaiz, gou couh aeu gij haeux gou gwn caengz liux haenx daj yangzdaiz dauj roengz laj bae, dinglingz deng daxmeh yawjraen lo. Daxmeh fatheiq doiq gou naeuz: “Mwngz vihmaz dauj haeux bae ne? Mwngz mbouj rox moix naed haeux cungj dwg boh-au nungzminz sinsin hojhoj ndaem okdaej ha? Baezlaeng sou haeux, mwngz ma lajmbanj bang boh’ au mwngz sou haeux, mwngz couh rox lo.” Gou deng hwk dwk heiq cungj mbouj gamj ok. Daxmeh ciepdwk naeuz: “Mwngz gwn mbouj liux couh cuengq youq gwnz daiz, gaej dauj bae, engq mbouj ndaej dauj roengz laj yangzdaiz bae!” Gou naeuz: “Meh, gou rox loek lo, baezlaeng mbouj gamj lo.”

(ngeih nienzgaep Loz Cinbungz)



1、0、6、9 ndaw suyozy vuengz-guek cingq cenglwnh bouxlawz bonjsaeh cei q hung, ceng haujlai nanz cungj mbouj miz gezgoj. 0 siengj daengz aen banhfap he: “Gizneix miz seiq aen daengq, raeuz

1、0、6、9 Bonjsaeh Bouxlawz Hung

1、0、6、9 谁的本领大

dauj guh ceng daengq doxdax, byawz sawj seiq vih soq gyoebbaenz aensoq cei q hung, bonjsaeh byawz couh cei q hung.”

Gyoengqde gig vaiq ciengj daengz aendaengq, gyoebbaenz le 1906. 1 naeuz: “Gou youq aensoq cienvih, daiyauj 1 cien, cozyung gou cei q hung!” 9 ciengj daengz aen soq bakvih, angq dwk naeuz: “Gou ciemq aensoq bakvih, daiyauj 9 bak, cozyung gou cei q hung!” 0 daekeiq naeuz: “Mbouj miz gou, sou couh cij gyoebbaenz sam vih soq lo!”

Seizneix, 6 doiq gyoengqde

naeuz: “1 ciemq le aensoq cienvih, aen seiq vih soq neix couh hung luma? Danghnaeuz hawj 9 ciemq, yienghneix couh dwg 9 cien, beij 1 cien hung lai lo!” Gyoengqde doeksaet dwk mwngz yawj gou gou yawj mwngz, dwg ha, aensoq gwnz cienvih yied hung, gyoebbaenz aen soq haenx couh yied hung. Danghnaeuz aensoq bakvih caeuq cibvih, daj gij soq lw roengzdaej haenx hix genj aensoq cei q hung, yienghneix aen soq seiq vih soq neix cij dwg aensoq cei q hung bw.

(Vei Siujdingz)